

## PROGRAMA No. 0328

# JOSUÉ

### Cap. 7:1 - 21

Ñambojoapy ko árape ñande estudio libro Josué rehegua, ha ñaguahë ko'ágã capítulo 7pe. Ko capítulo ja-estudiáta “Haigua ipu'aka Israelita kuérare.” Jahecháta avei “Josué ojekehárö guare ha Ñandejára he'i chupe mba'épa ojavova'erä.” “Acán omombe'u hembiaipo vai ha opaite mba'e oguerekóvare oñehundipa valle Acorpe.” Pe enemigo ivaivéva nde reguerekóva niko ndete voi, angirü che rendúva. Ha'e niko oiko nde pirépe nendive voi. Oipuru pe apytu'ü nde reipurúva opensa haguã heta mba'e ivaíva. Oipuru umi po nde reipurúva ojapo haguã tembiapo vai ha pe enemigo ikatu nembyai vaiete voi ambuekuéragui. Péva ha'e pa'ä tuichavéva nde reguerekóva nde rekovépe cristianoicha.

Oi niko moköi mba'e ombojetu'úva ñahenonde'a vove ko enemigope. Ñepyrürä, niko ndajahechakuaaséi jaguerekoha. Ndajahechakuaaséi ha'eha ñane enemigo. Maymáva ñande niko jaguerohory ko enemigo. Pe problema moköiha niko, oi ñande pype. Osëramo oñorairö haguã kuimba'éicha, iñambuemo'ä. Ha katu, nosëmo'ai. Ndaha'úi niko okyhyjéva, uvei oñorairö poräve hyepy guio.

Tetänguéra, táva ha vyvporakuéra, ohundi chupe ko enemigo hyepýguio. Jajuhu historia yma guarépe tembiosa añetehápe ojehuva'ekue, heta tiempo aja oñemohendava'ekue mitología apytépe, táva Troya orresistiva'ekue griego kuéra 10 año pukukue aja. Ipahápe, umi griego kuéra ohopa upe oihágui ha oheja oihaguépe hikuái peteï kavaju ojavova'ekue vyvrágui. Umi oikóva Troyape ogueraha upe kavaju vyvraguigua ha ominge itáva ryepýpe, ha upéva ohundíkuri táva Troyape, oïgui soldado griego upe kavaju ryepýpe. Ñande nañamañaivévo umi ñorairö yma guarére ha jajesareko umi ñorairö oikóvare campo espiritualpe, pya'ete jahechakuaa mba'érehepa iglesia kuéra oñehundi hyepy gotyo ha ndaha'úi ohundíva chupe mba'e vai oka gotyogua.

Ñandejára Jesucristo, ohaírö guare umi 7 Iglesia oíva Asia Menorpe, he'iva'ekue chupekuéra ñemoñe'ë. Upeichavéramo jepe, ni peteíva umi Iglesiape ohupyty ñemoñe'ë enemigo oka gotyogua rehe. Ha'e he'i Apocalipsis capítulo 2, versículo 14 ha 15pe kóicha: *"...Oime pene ndive umi ojeise'yva Balaam ombo'évagui...rereko avei upépe umi ojeise'yva nicolaíta kuéra ombo'évagui."* Ha upéi versículo 20pe, capítulo 2 Apocalipsispe he'i: *"Areko jepe peteĩ mba'e ha'eva'erä nde rehe. Ne kangy pe kuña Jezabel ndive, he'iva ijehe maranduharaha, ha ombotavýva che rembiguairape, omyañávo chupekuéra teko vaípe ha ho'úvo umi tymba ojejukava'ekue kuave'ëmby ramo ta'änga reikuérape."* Añetehápe Cristo he'i umi Iglesia kuérape: "Peë niko peguereko pende retepýpe upe penehundítava voi."

Pe tovamoköi ha jerovia'y Iglesia kuérape ko'ágã rupi, ombyai Ñandejára rembiapo opa rupiete, ombyaive ambue enemigo okapeguágui. Aña niko ikatu ombyai Iglesia kuéra hyepýguio, ndaha'ëi oka gotyo. Upéi avei máva oñehundikuaa hyepýguio.

Alejandro Magno rehe oje'e ha'ehague peteĩ militar ikatupyryvéva ambuekuéra renondépe omyakäve'kue ejército kuéra, upéicha omombe'u ñandéve historia ojehaiva'ekue. Ndaiporiva'ekue ambue ha'eichagua. Omboty mboyve 35 año, ha'e o-conquista jepéma pe mundo ojeikuaáva. Upeichavéramo jepe, omanóvo oiko chugui máva ika'úva. Ejesareko, ha'e o-conquista heta tenda ko yvy ape ári, ha katu ndikatúi o-conquista Alejandro Magnope voi. Oguerekova'ekue peteĩ enemigo hetepýpe, upéva ohundiete chupe.

Peteĩ ñorairö añoitépe Israel ra'ykuéra osé vaíkuri oñemomba'éro guare yvy pyahúre, upe derrota ouva'ekue hyepýguio, ndoikoiva'ekue okáguio. Israelita kuéra oike ramo guare tierra prometidape, ndoguerekoiva'ekue heta enemigo, oguerekova'ekue mbohapy enemigo mbarete ohenonde'áva chupekuéra. Umi mbohapy enemigo ñambojojakuaa mbohapy enemigo oguerekóvare cristianokuéra ko'ágãgua.

Echakuaamína Israel ha umi mbohapy enemigo, umíva niko Jericó, Hai, ha umi gabaonita. Mbohapyve enemigo Israel oguerekóva oñeha'ákuri ani haguä israelita kuéra oike

ha oñemomba'e tierra prometida rehe. Upe yvy oĩ upépe. Ñandejára he'iva'ekue chupekuéra imba'ekuéraha. Ñandejára ome'ëva'ekue chupekuéra pe título yvy rehegua, he'íramo guare Josuépe, amo capítulo 1 ko líbrope, versículo 3pe: *“Ha'ehaguéicha Moiséspe, opa yvy peë pepyriüháme ame'ëta peëme. Peë niko che retä”* Ñandejára he'i chupekuéra: “Penemba'e, peike peñemomba'e hese ha pevy'a ipype.”

¡Ko lección porãite ñane mba'erä ko'ágã, angirü che rendúva! Israelpe oñeme'ëva'ekue yvy tuichakuépe ohupytyva'ekue 777.000 kilómetro cuadrado, ha umi ára oĩ porãvehápe, ha'ekuéra oñemomba'ente 77.000 kilómetro cuadrado rehe.

Cristiano kuérape oñeme'ë opaichagua jehovasa espiritual. Ha katu, mboy jehovaságui, hermano che rendúva, reñemomba'éma ko'ágã rupi? Mboýpa añetehápe nemba'éma? Nde reguereko derecho umívagui. Reguereko pe título de propiedad. Ha katu, reñemomba'émapa hesekuéra ha revy'ámapa hesekuéra Ñandejára oipotaháicha? Ejepy'amongeta heta cristiano rehe ogehovasáva opaichagua bendición espiritual rehe, ha upeichavéramo jepe, oiko ha'éramo guáicha mboriahu ijespíritupe.

Ni peteĩ ko'ã bendición espiritual oivéma ñañemomba'e haguã hese. Ñandejára omboykéma ñane mba'erä, ha katu, javy'áta heseve. Oĩ ñorairö ñahenonde'ava'eräva ha victoria ñaganava'eräva. Kuatiañe'ë Efesios opa oikóvo tyapu armadura rehegua, ñorairö ryapu reheve, ha ñanerenói ñañemonde haguã Ñandejára armadura rehe.

Ko'ápe, Josué capítulo 7pe avei capítulo 8pe, jajuhu ñesë vai ñorairöme ha ñesë porä táva Haipe, umíva orrepresenta creyente peguarä to'o reko. Acán angaipágui oiko Israel angaipa. Umi jeguata angaipa to'o reko rehegua niko, he'iháicha versículo 21, capítulo 7pe niko:

Ñepyrürä, ohecha, téra pe paso físico:

Moköiha, oipota, téra pe paso mental;

Mbohapyha, ipojái, téra pe paso voluntario.

Ha ndikatúi oí säso angirü che rendúva, pe angaipa oje-juzga peve creyente rekovépe. Ñañepyrü upéicharö ñande estudio capítulo 7 Josué pegua, jahechakuaáta ko'ágã “Acán angaipa.” “Ñandejára pochý.” “Ha Israel ñesë vai ñorairöme Haipe.” Ñamoñe'ë versículo 1 Josué capítulo 7pe:

***Josué 7:1 “...Ñandejára ipochy opa Israel ñemoñare ndive.***

Ko versículo he'i ñandéve Israel ra'ykuéra iñangaipa hague, peteĩ kuimba'ente niko upe ojapova'ekue, Acán, upe hembiaipo vaiva'ekue. Upeichavéramo jepe, maymáva tetäyguápe ohupyty upe angaipa Acán ojapova'ekue. Iñinteresante mba'éichapa heta oñembo'y okápe ha oñe'ë vai Iglesiagua rehe. Oñe'ë mba'éichapa oho vai Iglesiakuéra ha pe apostasía oikeha ohóvo. Che voi ha'e jepi péicha. Ha katu, angirü che rendúva, ñañe'ë Iglesia rehe ha'éramo miembro, peteĩ mba'e, ha epyta eñembo'y okápe ejapo'yre mba'eve, ambue mba'e. Iglesia oí vai ramo ha oí apostasía pa'üme, ha añetehápe oí hína upéicha; upéicharamo angirü che rendúva, nde ha che ñaime implicado hendive ha'éramo miembro iglesia pegua. Peteĩ ñande rete rehegua hasýramo, opavave hasy avei. He'iháicha apóstol Pablo, primera carta Corintios, capítulo 12, versículo 2pe: “*Peteĩ ñande rete rehegua ohasa asy ramo, opavave hembýva ohasa asy avei. Ha peteivare oñeñangareko porã ramo, opavave ambue ovy'a hendive.*” Jaha jey ko'ágã Josué capítulo 7pe, ha ñamoñe'ë versículo 2 ha 3:

***Josué 7:2-3 “...ani remondo opavavépe oñorairö haguä. Ndatuichái upe táva.”***

Hai orrepresenta to'o rekópe. Heta hermano niko oí ombojeréva hína Jericó ombopúvo bocina. He'i ha'ekuéra ha'eha hermano oíva separado, opaite mba'ente voi ombovaipa ha he'i: “Ore niko ndorojapói kóva ni amóva.” Ha'ekuéra niko ojehekýi opaite mba'égui.

Oĩ heta ovy'áva Jericópe. Ipu'aka ko mundo rehe. Ha katu, mba'épa nde ere to'o reko rehe, angirü che rendúva? Oĩ hete hermano ipeligrosova Iglesia kuérape, umíva he'i ijehe ha'eha super-santo. Ndojapói kóva ni ndojapói amóva. Ipu'akáma ko mundo rehe, ha katu, nda'ipu'akái to'o reko rehe. Upépe osë vai hikuái. Ijapytepekuéra oĩ umi oñe'ë vaíva hapicháre, ha ojapóva umi mba'e ky'a ndohasáiva ñane akä rupi. To'o reko kangy imbarete hesekuéra. Ha'ekuéra oguerovia oiko poráha pe vida cristiana. Upe oikóva niko, ha'ekuéra oñe'ë pe vida victoriosa rehe, ha ndoikuaái mba'épa he'ise upéva. Pe vida victoriosa niko Cristo rekove. Cristo niko upe oganáva pe victoria, ndaha'úi ñande.

Israel ra'ykuéra ovy'aitei ogana haguére peteĩ victoria. Ipu'aka Jericó rehe. Añetehápe Ñandejára victoria kuri, nda'aréi rire, israelita kuéra oimo'ã ha'ekuéra hague umi imbaretéva. Josué omondókuri mbovy kuimba'épe oikuaa haguã mba'éichapa táva Hai. Ha ojesareko rire upe távare, he'i: "Hai ndaha'úi mba'eve ñambojojáva Jericó ndive." Hai niko táva michi, ha'ekuéra nomomba'úi. Heta hermano osë porã ipu'akávo ko mundo rehe, ha oguerovia ipu'akamaha ho'o rehe avei, ha añetehápe novencéi gueteri chupe. Ñamoñe'ë ko'ágã versículo 4 ha 5, Josué capítulo 7pe:

***Josué 7:4-5 "...maymáva Israel ñemoñare py'a ho'a yvýre ha opyta okyhyje hikuái."***

Israelita kuérape omuña kuimba'ekuéra Hai pegua. Heko ro'o kangy ipu'aka hesekuéra. Ha'ekuéra niko osë poräkuri Jericópe, iñe'ërendúgui Ñandejárape. Tuicha osë vai Haipe, ndojapóigui umi mba'e Ñandejára he'iva'ekue chupekuéra. Angirü che rendúva, ndikatúi jaipuru peteĩ táctica meme ñañorairö haguã to'o reko ha ko mundo ndive avei. Israelita kuéra ohechakuaa moöpa ikangy hikuái. Apóstol Pablo oikuaa porã ha'e ikangyha he'íramo guare amo Romanos, capítulo 7, versículo 18pe kóicha: "*Che aikuaa, che pype, che reko kangýpe ndaiporíha pe iporäva. Ajapose ramo jepe iporäva, naiméi ajapo haguäicha.*" Rehechakuaápa, angirü cristiano che rendúva, ndereguerekoíha pu'aka nde pype? Nde nikatúi reiko pe vida cristiana ndejehegui, ha Ñandejára araka'eve ndojerureiva'ekue ndéve reiko haguã. Ñandejára voi oikose nde rehehápe. Apóstol Pablo ohai Romanos, capítulo 7pe he'ívo

ndaiporiha mba'eve iporäva ñande reko tujápe. Avei ohai ndajaguerekoiha pu'aka ñande reko tujápe. Pe nueva naturaleza oikose Ñandejárape guarã, ha katu ndoguerekói pu'aka ojapo haguä upéva. Romanos capítulo 8pe, oñe'ë ñandévese Ñandejára Espíritu Santo rehe. Ha ñane renyhë jave Ñandejára Espíritu Santogui ae, ikatu jaiko vida Cristiana añete. Ñamoñe'ë ko'ágä versículo 6 ha 7, Josué capítulo 7pe:

***Josué 7:6-7 "...jropytanteva'erämo'ü Jordán ysyry mboypýri rohasa'y rehe ko'a gotyo."***

Ñahendúmakuri ko'ä ñe'ë ambue jey. Josué oñe'ë péicha oñembyasygui. Oikümbýkuri umi ñe'ë desiertope Israel ra'ykuéra ndive. Josué ndahe'iriva'ekue péicha ymave, ha katu, ko'ágä he'íma. Nahesakái chupe mba'érehepa operde hikuái upe ñorairö. Upévare, omondoro ijao ha oñembo'e. Ñamoñe'ë ko'ágä versículo 8 ha 9, Josué capítulo 7pe:

***Josué 7:8-9 "...mba'épa rejapóta ani haguä nde réra herakuü vai?"***

Ehendumi mba'épa ombohováí Ñandejára. Ñamoñe'ë versículo 10:

***Josué 7:10 "...Epu'ü. Mba'e piko rejapo upe yvýpe?"***

Ñandejára he'i Josuépe topu'ä ha anive hasë reipa, ijao soro ha tanimbu iñakäre. Oï ninko heta cristiano ohasáva heta tiempo hasëvo Ñandejára renondépe. Ha Ñandejára he'i umi mba'e ndovaleiha mba'everä. Upéicha nañasolucionamo'ái mba'ëveichagua problema.

Oï niko heta kuñataï ha kuñakarai iglesia kuérape oimo'äva ha'eha espiritual, noikyñiri ramo iñakarague, noñemonde porairö ha hova puku ramo. Ha'ekuéra oimo'ä upéicha ohechauhaka ijespíritual-ha. Añetehápe, ohechauhaka noñangarekoïha ijehe. Ha Josué ojapókuri upéicha avei. Josué niko pe general, ojehecha vaieterei ijao soro reheve. Ha Ñandejára he'i chupe opu'ä haguä. Ha versículo 11pe he'i kóicha:

***Josué 7:11 “...omonda ha omongañy hembiporu apytépe umi mba’e oñehundiva’erä.”***

Josué ndoikuaái Israel iñangaipaha. Ndoguerekói pe discernimiento espiritual oguerekova’ekue iglesia ypykue. Ndépa nemandu’a Ananías ha Safira ijapúramo guare pe yvy ovendeva’ekuére, jajuhúva amo libro Hechos de los apóstoles, capítulo 5pe, Espíritu Santo oikuaauka pya’ete ha iglesia pegua opyta okyhyje angaipa apógui. Josué katu ndoikuaái oíha angaipa, upéicha avei Israel guakuéra. Ñandejára he’i Josuépe oíha angaipa campamentope ha o-juzgava’erä chupekuéra. Ñamoñe’ë ko’ágã versículo 14:

***Josué 7:14 “...upe ogagua che aiporavóva oguerúta peteitei mayma kuimba’épe.”***

Judá tribu pegua ha Zera rogagygua ojejuhu hembiaipo vaiha. Jahasa ko’ágã versículo 18pe:

***Josué 7:18 “... Zabdi, Zera ra’y, ha opavave ko’áva Judá ñemoñare.”***

Israel tekotevéva’ekue ohasa ko’ã mba’e rupive oikuaa haguã mávapa upe hembiaipo vaiva’ekue. Ijetu’úkuri chupekuéra guarã ohechakuaa haguã oíha angaipa campamentope, ha vaicha ijetu’u ñandéve guarã avei, jahechakuaa haguã tembiapo vai Iglesiape. Umi miembro Iglesia pegua ha’ete ndohecháiva mba’evéichagua tembiapo vai oikóva ijerére. Pya’e ikatu ohechakuaa tembiapo vai ojejapóva club nocturnope, téra bar oíva esquinape téra máva ha’eva politico rembiapópe. Ha katu, ndohechakuaái angaipa oíva hogapýpe téra iglesiape. ¡Ajépa ivaiete upéva! Ñamoñe’ë ko’ágã versículo 19 al 21 ko capítulo 7 Josué pegua:

***Josué 7:19-21 “...Añotý che róga guýpe, ha upe pláta amoï huguaitépe.”***

Ejesareko mba’éichapa oñembohape Acán angaipa. Ohecha, oipota ha ipojái hese. Kóicha oñembohape angaipa to’o reko kangy rehegua. Pe jurumy’yi, crítica, envidia, ha takate’y; ko’áva niko angaipa to’o reko kangy rehegua. Ogueru jeiko vai ha jehasa asy.

Jahechakuaamína pe crítica, téra ñe'ë rei. Omombarete chéntese. Omomaña maymávape hesénte. Máva oimo'ã iporáveha opaite mba'épe upe tapicha ha'e oñe'ehágui. Upévare máva oíva Junta Directiva Iglesia pegua o-critica i-Pastorpe. Ha'e oíva Junta Directiva oimo'ã oí poráveha Pastor gui. Angaipa to'o reko rehegua oíva ipype: ohecha, oipota ha ipojái.

Mba'épa ojapo raka'e Acán Josué he'íramo guare omombe'u haguã upe ojapova'ekue? Acán omombe'u ñangaipa. Ñande pu'aka haguã ñande ro'o reko kangýre, angirü che rendúva, máva ha'éva creyente omombe'uva'erã ñangaipa. Angaipa ndoje-juzgáirö, ndikatúi jaguereko mba'eveichagua comunión Ñandejára ndive.

Mba'éicha piko nde reguerekokuaa comunión Ñandejára ndive? Mba'éicha reguerekokuaa pu'aka nde rekovépe? Apóstol Juan, primera carta, capítulo 1, versículo 5 ha 6pe he'i: *“Kóva hina pe ñe'ë Jesucristo orembo'eva'ekue ha amyerakuäva peëme: Ñandejára hina tesapehára ha ipype ndaipóri mba'eveichagua pytü. Ja'éro ñaimeha hendive ha jaiko pytümbýpe, ñande japu ha ndajaikói pe añete ojerureháicha.”* Angirü che rendúva, nde niko nerembotavýi avavépe ere jave reguerekoha comunión Ñandejára ndive, ha katu reiko angaipápe. Ehendumi mba'épa he'i apóstol Juan primera carta, capítulo 1, versículo 7 ha 8pe: *“Ha jaiko ramo tesapeha rendýpe, Ñandejára oikoháicha tesapeha rendýpe, upéicharö ñaime oñondive peteï py'ápe, ha Ita'yra Jesucristo ruguy ñane mopoti ñane angaipágui. Ja'éro ñañane angaipaha, ñañembotavy ñande jupe voi, ha ndaipóri ñande pype añete.”*

Angirü che rendúva, nde ndikatúi regueru Ñandejárape ha rembojoja nde rehe. Ndikatúi avei nde reñembojoja Ñandejárare. Upévare, nde reiko poráva'erã Ñandejára ndive. Upéva nde ikatu rehupyty peteï hendáicha año, rehechakuaa ha remombe'u jave ne angaipa. He'i apóstol Juan, primera carta, capítulo 1, versículo 9pe: *“Ha ñañemombe'úrö ñane angaipágui, ikatu jarovia Ñandejára, heko jojáva, oheja reitaha ñane angaipa ha ñane mopotitaha opa teko añágui.”* Nde, angirü che rendúva, nde pu'akáta ko yvy ape ári rekóre jerovia rupi. Ndepu'akáta to'o reko kangýre remombe'úvo ne angaipa, reiko porávo Ñandejára ndive, ha

nerenyhëvo Espiritu Sántogui.

Ñandejára Ñe'ë he'i nde ere ramo ndereguerekoïha angaipa, nde japu. Maymáva yvypóra japeka. Angirü che rendúva, mba'épa nde ere angaipa rehe? Reñemombe'uva'erä. Ha, mba'éichapa jajapóta upéva? Ha, emombe'u Ñandejárape upe rejapova'ekue, ojapo haguéicha Acán he'ivo Josuépe upe ojapova'ekue. Emombe'u Ñandejárape upe reguerekóva ne korasö ruguápe. Iporäve remombe'upa Ñandejárape, Ha'e oikuaapa upe rejapova'ekue.

Máva omombe'uva'ekue peteï jey oihague peteï aty hermano kuéra junta misionera rehegua oñembyatýva jepi sábado pyhareve jave. Opa katuete upe aty ñembo'e reheve. Upe junta pegua presidente ha'e peteï doctor katupyry, ha oñembo'e jave katuete he'i jepi kóicha: "Ore Jára, oime rire rofalla, ore perdonamína upéva." Peteïva upe Junta pegua miembro, ikane'öma ohendu rehe cada semana upe ñembo'e. Upémarö, oho pe hermano consultoriope ha he'i chupe: Nde reñembo'e jave, katuete ere jepi "oime rire rofalla." Nde piko ndereikuaái rejapohague angaipa? Pe doctor ombohováï, chéverö guarä aikuaa. Upémarö pe ambue miembro Junta pegua he'i chupe: "Ejepy'amongetána upéicharö, mba'épa ne angaipa." Ndépa reikuaa, angirü che rendúva, pe doctor oñembo'e jeývo ambue ára, ojepy'amongeta mba'épepa ojavy ha omombe'úma. Maymáva ñande niko, jajereseterei ñañembo'e jave ha ñañamombe'uséi ñane rembiapo vai. Eñemboja Ñandejára rendápe ha emombe'upa chupe ne angaipa. Nereñemombe'úi ramo, ndikatúi reguereko vy'a ni pu'aka nde rekovépe. Neremombe'úi aja ne angaipa, ndereguerekomo'ái perdón.

Angirü che rendúva, opáma ñande aravo ko ára pegua. Upévare japytáta ko'ápe. Ambue prográmape ñamohu'äta ñande estudio Josué capítulo 7 rehegua. Jajojuhu jey peve. Ñandejára tanderovasa ndéve ha nde rogayguápe avei.